

տա ձէզար և նա 'ի Կոստանդինուպօլիս : Հայք տուեալ էին նմա 300 քսակս արծաթոյ , նոյնպէս եւ Յոյնք , զոր հաստատեալ 'ի դատարանէ՝ ետուն նմա : Եւ Իսմայիլ Փաշա եկեալ պաշարեաց զքաղաքն Յոսպէ , և սկսաւ պատերազմիլ ընդ Մէհէմէտ Փաշայի՝ որ որջացեալ կայր անդ , և 'ի նեղ արկեալ տագնապէր զտեսուչն Հայոց զՂազար վարդապետ , արկեալ զնա 'ի դանս և 'ի բանտս : Տեւեաց պատերազմն ընդ երկար՝ զի Իսմայիլ արտաքուստ և Մէհէմէմէտ 'ի ներքուստ՝ որոտմունք հրանօթից դըրդէին ըզգաշտն Սարոնի :

Մէհէմէմէտ Փաշա կոչեալ զվարդապետս վանօրէից՝ երկիցս և երկոցս՝ պահանջէր 'ի նոցանէ դրամ , և 'ի բաց ասել նոցա , հարկանէր ուսամբ և կամ կացնիւ՝ որ 'ի ձեռին իւրում , և սպառնայր ժողովրդոց մատնել 'ի մահ , և այսպիսի եղանակաւ էառ 'ի Ղազար վարդապետէ 120 քսակս , թող զայլս . քայքայեալ աւերեցան շինուածք վանաց եւ կալուածոց , զի այժմեան բռնութիւնն առաւել եղեւ քան զՔաղըլիացոցն , զի յայնժամ վաճառեցին զոսկի , զարծաթ և զսկիւնձ , և զծանրութիւն հարկացն բարձին . իսկ այժմ մերկացեալ յամենայնէ՝ ոչ ինչ գտանին հատուցանել նոցա : Եւ յաւուրս յայտօրի ել համբաւ լինել կուսակալ Դամասկոսի և Երուսաղէմի Ապտուլլահ Փաշայի , որոյ վասն հրամանաւ ձէզար Փաշայի առին զսահմանեալ տարեկան տուրան՝ զորս կոչէին Ուլու-դէյէթ և Սահ-ճաթէյէ , և ապա պահանջէին 50 քսակ եւս Իսր-ճէյէ : Նեղեալ յայսպիսի տառապանաց թէոդորոս Պատրիարքի վշտագին սրտիւ դրեաց առ ազգայինս Կոստանդինուպօլսոյ ձեռն կարկառել և թեթեւացուցանել զծանրութիւն բեռին :

Միաբանք Հայոց 'ի տաճարին Ս . Յարութեան , 'ի պատարագելն յիւղաբերից սեղանն , զլուացարանն դնէին առաջի Խաչելութեան պատկերի , եւ լուսարարն Լատինաց յանդգնութեամբ համարձակեցաւ բառնալ զայն անտի . 'ի ծանուցանել թէոդորոսի Փոխանորդի նոցին , նա ազդարար 'ի ձեռն ոմանց չղնել զայն 'ի նոյն տեղի . և ընդդիմանալն Հայոց , ահացուցին զնոսա երկեցուցիչ բանիւք լինել անհնարին . ապա 'ի խորհրդեան սահմանեալ են զըրել 'ի Կոստանդինուպօլիս և յայլ տեղիս , թէ Հայք բըւ-